

## AMSHC • Ditar Nr. 10

*(Prill - Qershor 2016)*

### Konferenca "Sfidat dhe Mundësitë për Punësimin e Grupeve të Margjinalizuara nga Ndërmarrjet Sociale"

Tiranë, 20 prill 2016

Partnerët Shqipëri organizoi në Tiranë, konferencën "Sfidat dhe Mundësitë për Punësimin e Grupeve të Margjinalizuara nga Ndërmarrjet Sociale", në të cilën mori pjesë edhe z. Ferhat Aga, në cilësinë e përfaqësuesit të AMSHC-së.

Në konferencë u prezantuan gjetjet e studimit "Sfidat dhe Mundësitë për Punësimin e Grupeve të Margjinalizuara nga Ndërmarrjet Sociale" në Shqipëri dhe Maqedoni, duke ofruar një vështrim të përgjithshëm të ndërmarrjeve sociale, karakteristikave të zhvillimit të tyre, shtrirjes, si dhe mundësive për punësimin dhe integrimin e grupeve të margjinalizuara.

Pjesë e prezantimit dhe diskutimeve në konferencë ishin edhe perspektivat dhe praktikatat e ndryshme të zhvillimit të kuadrit ligjor dhe praktik në vendet e rajonit dhe më gjerë.



## Konferencë Kombëtare - "Fuqizimi i Strukturave të Qeverisjes Vendore dhe Bashkëpunimit mes të Zgjedhurve Vendorë në Shqipëri – Faza II"

Tiranë, 3 maj 2016

Këshilli i Evropës organizoi në Tiranë konferencën kombëtare "Reforma në Qeverisjen Vendore dhe Administratën Publike – Mundësi të reja për Administratën Vendore".

Konferenca mbledhi së bashku ministra, donatorë, përfaqësues të qeverisjes vendore, përfaqësues të shoqërisë civile dhe ekspertë për të diskutuar rreth zhvillimeve të fundit në lidhje me reformën e administratës publike. Në këtë konferencë mori pjesë dhe një përfaqësues i Agjencisë për Mbështetjen e Shoqërisë Civile (AMSHC).

Në sesionin hapës të kësaj Konference fjalën e mori z. Bledi Çuçi, Ministër i Shtetit për Çështjet Vendore, z. Christoph Graf, Ambasador i Zvicrës në Shqipëri si dhe znj. Claudia Luciani, Drejtoreshë e Qeverisjes Demokratike, Drejtorja e Përgjithshme e Demokracisë, Këshilli i Evropës.

Ekspertët e KIE-s prezantuan vlerësimin e nevojave kombëtare institucionale dhe të trajnimit në lidhje me qeverisjen vendore, i kryer përpara zgjedhjeve lokale të qershorit 2015. Ky vlerësim, i parë i këtij lloji dhe me këtë fushë veprimi në Shqipëri, do të shërbejë si bazë për administratën vendore në Shqipëri për zbatimin e reformës së administratës vendore.

Gjatë punimeve të kësaj konference përshëndeti dhe Ministria e Shtetit për Inovacion dhe Administratën Publike, znj. Milena Harito e cila i siguroi partnerët ndërkombëtarë për angazhimin e qeverisë për çuarjen përpara të Reformës në Administratën Publike, të shoqëruar me modernizimin e shërbimeve, duke e sjellë atë më afër qytetarëve në të gjithë vendin.

Më tej konferenca vazhdoi punimet me një sërë prezantimesh, diskutimesh dhe shkëmbim eksperiencash, të cilat konvergjuan drejt nevojës për të konsoliduar dhe për të formalizuar instrumentet moderne ekzistuese dhe praktikatat e mira që kanë të bëjnë me Menaxhimin e Burimeve Njerëzore në nivel lokal dhe kombëtar.

Në fund konferenca përmbylli punimet e saj duke nxjerrë një sërë konkluzionesh, të cilat do të udhëheqin punën në të ardhmen.



## Takim përmbyllës mbi Draft Strategjinë 2014-2018, në kuadër të Programit të Grandeve të Vogla për Mjedisin, si pjesë e Programit Mjedisor Global implementuar nga UNDP

Tiranë, 10 maj 2016

Programi i Grandeve të Vogla Mjedisore (GEF SGP) në Shqipëri, si pjesë e Programit Mjedisor Global, nëpërmjet Qendrës Rajonale për Mjedisin (REC) Shqipëri, organizoi në ambientet e Hotel Tirana International, me partnerë dhe aktorë të interesuar në këtë fushë, takimin përmbyllës të konsultimeve rreth Draft Strategjisë të këtij Programi Kombëtar, për Fazën Operacionale 6 (OP6) 2014-2018.

Në këtë takim morën pjesë përfaqësues nga Ministria e Mjedisit, UNDP, AMSHC, REC Albania, përfaqësues Qendrash dhe Organizatash të Shoqërisë Civile etj.

Qëllimi i këtij takimit ishte prezantimi i Draft Strategjisë përfundimtare të OP6 GEF / SGP.

Pjesëmarrësit në këtë takim shprehën pikëpamjet e tyre rreth Strategjisë se prezantuar para auditorit dhe ofruan ndihmesën e tyre me mendime dhe sugjerime lidhur me fushat që ishin në fokus të kësaj Strategjie.

Gjatë takimit diskutimet u përqendruan në fushat e mëposhtme:

1. Biodiversiteti
2. Ndryshimet klimatike
3. Ndotësit Organikë të Qëndrueshëm - NOQ / Kimikatet,
4. Degradimi i tokës / Menaxhimi i qëndrueshëm i tokës dhe
5. Ujërat ndërkombëtare

Në takim u theksua se Program i Grandeve të Vogla (SGP) siguron për organizatat jo qeveritare me bazë në komunitet, në vendet në zhvillim, grande të cilat ju mundësojnë atyre veprimtari ku të trajtojnë sfidat globale mjedisore duke adresuar nevojat lokale për zhvillimi të qëndrueshëm.

Programi i Grandeve të Vogla është një program në kuadër të Programit Global Mjedisor implementuar nga UNDP-ja dhe ekzekutuar nga UNOPS-i. Ky program ka filluar financimin e projekteve në Shqipëri që në vitin 1998 dhe ka financuar gjithsej 231 projekte.

Në fund të takimit organizatorët falënderuan dhe siguruan pjesëmarrësit se të gjitha komentet dhe mendimet e shprehura në këtë takim përmbyllës, do të pasqyrohen në variantin përfundimtar, i cili pasi të jetë miratuar, do të bëhet publik shumë shpejt.



## Tryezë Konsultative "Pjesëmarrja e Publikut në Procesin e Vendimmarrjes së Kuvendit të Shqipërisë, një Fokus në Transparencën Parlamentare"

Tiranë, 18 maj 2016



Në ambientet e Kuvendit të Shqipërisë, nën kujdesin e Kryetarit të Kuvendit, z. Ilir Meta u zhvillua tryeza konsultative me temë "Pjesëmarrja e Publikut në Procesin e Vendimmarrjes së Kuvendit të Shqipërisë, një Fokus në Transparencën Parlamentare".

Aktivitetin e përshëndeti Kryetari i Kuvendit z. Ilir Meta duke vlerësuar rolin e publikut në vendimmarrjen e këtij institucioni, e cili ndikon në mënyrë direkte në veprimtarinë e tij.

Kreu i Kuvendit konfirmoi se institucioni i Kuvendit do të jetë gjithnjë një institucion i hapur dhe gjithëpërfshirës dhe me një administratë efektive.

Të pranishëm në këtë aktivitet ishin Ambasadori i OSBE-së, z. Florian Rauning; Nënkryetarët e Kuvendit, znj. Valentina Leskaj dhe z. Edmond Spaho; Ministrja e Shtetit për Marrdhëniet me Parlamentin, znj. Ermonela Felaj; Deputetë; përfaqësues të trupit diplomatik të akredituar në vendin tonë; përfaqësues nga AMSHC-ja dhe shoqëria civile si dhe përfaqësues të medias etj.

Këtë tryezë e përshëndeti dhe Ambasadori i OSBE-së, z. Florian Rauning, i cili vlerësoi maksimalisht bashkëpunimin me institucionin e Kuvendit për një sërë aktivitetesh të përbashkëta

me pjesëmarrjen e të gjitha forcave politike. Ai theksoi se kemi organizuar 14 Forume, kemi mbështetur Aleancën e Grave Parlamentare, Ditën e Hapur të Kuvendit, kemi kontribuar për ndërtimin e urave të bashkëpunimit midis Kuvendit dhe Shoqërisë Civile, kemi trajnuar një grup trajnerësh si dhe kemi hapur dy zyra pilot në dy qarqe të vendit.

Më tej fjalën e mori Sekretarja e Përgjithshme e Kuvendit, znj. Albana Shtylla, e cila prezantoi Raportin Vjetor 2015 mbi Pjesëmarrjen e Publikut në Procesin e Vendimmarrjes dhe konkretisht analizoi tema të tilla si pjesëmarrja e publikut në Komisionet Parlamentare, në Seancat Plenare, transparenca parlamentare etj. Znj. Shtylla vlerësoi në këtë takim pjesëmarrjen e përfaqësuesve të shoqërisë civile, grupeve të interesit dhe medias si një mundësi për të shkëmbyer mendime dhe ide në interes të qytetarit.

Më pas, tryeza vazhdoi me diskutime nga të pranishmit në funksion të përmirësimit të bashkëpunimit midis Kuvendit, Organizatave të Shoqërisë Civile, medias dhe publikut.

Në fund të takimit u bënë dhe një sërë rekomandimesh për të përmirësuar bashkëpunimin me shoqërinë civile në të ardhmen.

## Tryezë e rrumbullakët "Administrata vendore pas zgjedhjeve – sfidat e riorganizimit"

Tiranë, 24 maj 2016

Në ambientet e Kryeministrisë, në kuadër të iniciativave publike të pjesëmarrësve të Shkollës Shqiptare të Studimeve Politike, u organizua aktiviteti në formën e një tryeze të rrumbullakët me politikë bërës, përfaqësues të qeverisjes vendore, ekspertë, përfaqësues nga AMSHC-ja si dhe përfaqësues të shoqërisë civile.

Aktiviteti u përshëndet nga z. Enea Hoti, këshilltar i Ministrisë për Çështjet Vendore si dhe z. Artan Shkëmbi, drejtor i përgjithshëm i Agjencisë së Zbatimit të Reformës Territoriale.

Gjatë këtij aktiviteti u diskutua lidhur me reformën administrative-territoriale, e cila synon uljen e kostove administrative dhe rritjen e efikasitetit të shërbimeve, bazuar mbi gjetjet dhe rekomandimet e një punimi kërkimor të përgatitur nga grupi organizator.

Debati i hapur i pjesëmarrësve pati si qëllim analizimin e efikasitetit të kësaj reforme të re me synim nxitjen e një brezi të udhëheqësve të rinj politikë dhe shoqërisë civile, të dedikuar për implementimin e modeleve më të mira demokratike të qeverisjes dhe zhvillimit. Shembulli i efikasitetit të kësaj reforme u analizua Bashkia Fier.

Të pranishmit vlerësuan iniciativën e pjesëmarrësve të Shkollës për të studiuar këtë temë mjaft të rëndësishme dhe theksuan se është e nevojshme që shembujt pozitivë dhe problemet që mund të jenë shfaqur pas zbatimit të reformës të trajtohen me vëmendjen e duhur dhe me përfshirjen e të gjithë aktorëve të shoqërisë.

Gjatë diskutimeve u dhanë një sërë mendimesh dhe sugjerime nga ekspertë dhe përfaqësues të grupeve të interesit, të cilat do të përmbledhen në një dokument, i cili do t'i ofrohet zyrtarisht institucioneve shqiptare dhe përfaqësive të huaja diplomatike në vendin tonë, me qëllim krijimin e një ideje më të qartë të situatës aktuale dhe nxitjen e një dialogu publik gjithëpërfshirës mbi problematikat dhe gjetjen e zgjidhjeve.



## Event ne kuadër të projektit "STAR - Një shembull i shkëlqyer bashkëpunimi"

Tiranë, 26 maj 2016

Në ambientet e Galerisë Kombëtare të Arteve, në kuadër të projektit "STAR- Një shembull i shkëlqyer bashkëpunimi", u organizua një aktivitet me përfaqësues të qeverisjes qendrore dhe vendore, ekspertë të fushës, përfaqësues të donatorëve të huaj, përfaqësues nga AMSHC-ja si dhe përfaqësues të shoqërisë civile.

Aktiviteti u përshëndet nga z. Bledi Çuçi, Ministër Shteti për Çështjet e Johan Ndisi, i Ngarkuar me Punë në Ambasadën e Suedisë në Tiranë, znj. Rajmonda Balili, Kryetare e Bashkisë Patos si dhe z. Erion Veliaj, Kryetar i Bashkisë Tiranë.

Gjatë këtij aktiviteti u diskutua lidhur me reformën administrativo-territoriale, efikasitetin e kësaj reforme, e cila synon uljen e kostove administrative dhe rritjen e shërbimeve ndaj qytetarëve.

Eventi pati si qëllim analizimin e modeleve më të mira demokratike të qeverisjes vendore në funksion të zhvillimit të vendit. Si shembull i efikasitetit të kësaj reforme u analizua Bashkia Tiranë dhe Patos.

Të pranishmit vlerësuan arritjet e kësaj reforme si mjaft të rëndësishme dhe theksuan se është e nevojshme që shembujt pozitivë si dhe problemet që mund të jenë shfaqur pas zbatimit të reformës të trajtohen me vëmendjen e duhur dhe me përfshirjen e të gjithë aktorëve të shoqërisë.

Takimi u përmbyll me një shfaqje dixhitale të rrugëtimit të Reformës Administrativo-Territoriale, kontribut i projektit "STAR".



## Konferenca: "Roli i Shoqërisë Civile në Reformën e Administratës Publike - Standardet dhe Praktikrat e BE-së"

Prishtinë (Kosovë), 6 - 8 qershor 2016

Përfaqësuesi i Agjencisë për Mbështetjen e Shoqërisë Civile (AMSHC), z. Erion Banushi mori pjesë në konferencën "Roli i Shoqërisë Civile në Reformën e Administratës Publike - Standardet dhe Praktikrat e BE-së", e cila u mbajt në Prishtinë, nga data 6 - 8 qershor 2016, nga projekti TACSO dhe i financuar nga Bashkimi Evropian.

Qëllimi i kësaj konference ishte mbledhja së bashku e rreth 80 pjesëmarrësve nga shoqëria civile, institucionet evropiane dhe autoriteteve kombëtare nga gjashtë vendet e Ballkanit Perëndimor dhe Turqisë për të ndarë përvojat dhe idetë në lidhje me Parimet e Administratës Publike dhe Udhëzimet e KE për Mbështetjen që Shoqëria Civile në Vendet Kandidate.



## AMSHC shpall listën e projekteve fituese të Thirrjes Nr. 9

Tiranë, 15 qershor 2016

AMSHC falenderon të gjithë përfaqësuesit e organizatave të shoqërisë civile për interesimin e shprehur me projekt-propozime në kuadër të kësaj thirrje.

Për më shumë vizitoni online faqen zyrtare: [www.amshc.gov.al](http://www.amshc.gov.al)

### Takimi i parë i Këshillit Kombëtar për Shoqërinë Civile (KKSHC)

Tiranë, 23 qershor 2016

Pas përfundimit të procesit të verifikimit të votave dhe shpalljes së listës emërore me anëtarët e zgjedhur nga organizatat e shoqërisë civile për Këshillin Kombëtar për Shoqërisë Civile (KKSHC), u zhvillua takimi i parë i KKSHC-së në ambientet e Ministrisë së Mirëqenies Sociale dhe Rinisë.



### Takim i Komitetit të Përbashkët Teknik

Prevezë (Greqi), 16 qershor 2016

Si pjesë e Komitetit të Përbashkët Teknik (Joint Technical Committee - JTC), përfaqësuesi i Agjencisë për Mbështetjen e Shoqërisë Civile (AMShC), z. Ferhat Aga, mori pjesë në takimin e organizuar në zonën e Prevezës, Greqi në kuadër të ditëve informuese mbi Thirrjen Nr. 2 për Projekt-Propozimet.

Këto projekt-propozime fokusohen në funksion të bashkëpunimit ndërkufitar IPA Cross Border Programme Greqi-Shqipëri 2014-2020.

Në takim u komunikua lidhur me mënyrën e aplikimit, kriteret dhe specifikimet e linjës buxhetore.

Në takim morën pjesë përfaqësues të Shoqërisë Civile të të dy shteteve, por edhe përfaqësues të Qeverisë.





## Vizitë studimore "Përfshirja e Shoqërisë Civile në Vendimmarrje - Modeli i Estonisë"

Talin (Estoni), 27 - 30 qershor 2016

Në kuadër të komponentit për mundësimin e mjedisit të Udhëzimeve për Mbështetjen e Shoqërisë Civile në Vendet e Zgjerimit për periudhën 2014-2020, TACSO Albania dhe TACSO Serbia organizuan një vizitë studimore për përfaqësuesit e Bordit Mbikëqyrës, Drejtorit Ekzekutiv dhe stafit të Agjencisë për Mbështetjen e Shoqërisë Civile (AMSHC) - Shqipëri, institucionet publike në Serbi përgjegjëse për shoqërinë civile dhe OSHC-të që punojnë për këtë çështje.

Vizita studimore fokusohet në njohjen e strategjive, mekanizmave dhe modeleve të bashkëpunimit për përmirësimin e mjedisit mundësues për OSHC-të në Estoni, bashkëpunimi Shoqëri Civile - Publik si dhe financimi publik për shoqërinë civile.

